



**DEKRETU-LEI n.º 5 /2020,
6 Fevereiro**

**ORGANIZASAUN NO FUNSIONAMENTU KOMISAUN RAI NO
PROPRIEDADE NIAN**

Aprovasaun ba Lei n.º 13/2017, 5 Juñu no introdusaun rejime jurídiku kona-ba definisaun direitu propriedade kona-ba bein imovel, determina tiha nesesidade atu halo regulamentasaun ba Komisaun Rai no Propriedade, nu'udar organizmu ne'ebé lei konfia atu rezolve kazu haksasuk malu kona-ba bein imovel. Diploma ida-ne'e hatuur regra sira kona-ba organizasaun, funsionamentu no estatutu ba membru sira Komisaun Rai no Propriedade nian, hatuur mós regra hirak-ne'ebé bele aplika ba prosesu ne'ebé tama iha ninia kompeténsia.

Tuir buat ne'ebé hamosu hosi lei, Komisaun Rai no Propriedade nu'udar entidade administrativa independente ne'ebé iha misaun atu rezolve kazu haksasuk malu iha âmbito prosesu ba rekoñesimentu no atribuisaun direitu sira propriedade nian.

Haktuir ninia natureza, nu'udar karaterística prinsipál Komisaun nian maka independénsia no responsabilidade hosi ninia membru sira, ne'ebé sujeita ba rejime incompatibilidade hanesan ho ida-ne'ebé bele aplika ba titulár órgaun soberania. La'ós ida-ne'e de'it, iha ninia atuasaun, Komisaun vinkula ho prinsípiu sira kona-ba transparénsia no publidade, ne'ebé reflète iha ninia estrutura no organizasaun, nomós iha prosesu hatuur desizaun nian.

Kona-ba ninia estrutura interna, Komisaun Rai no Propriedade prejidi hosi presidente ida, ne'ebé hetan apoiu hosi sekretariadu tékniku ida, ne'ebé asegura apoiu administrativu, tékniku no jurídiku ne'ebé presiza hala'oho didi'ak ninia atribuisaun sira. Iha Komisaun, prevee mós funsionamentu servisu mediasaun ida, ho intuitu atu realiza kompozisaun justa ba litíjiu liuhosi akordu entre parte sira.

Prosedimentu ne'ebé bele aplika ba hatuur desizaun orienta hosi prinsípiu igualdade ba parte sira, kontraditóriu, boa-fé, asesu ba justisa no publidade ba desizaun sira. Nune'e, ho objetivu atu asegura igualdade ba meiu sira entre parte sira, konsekuénsia hosi direitu asesu ba justisa, Komisaun disponibiliza servisu apoiu jurídiku gratuitu, bainhira de'it parte sira husu.

Iha prosesu desizaun nian, Komisaun sei organiza ba painél arbitrál ho autonomia hodi hatuur desizaun, ne'ebé forma hosi jurista na'in-rua no tékniku ida ba rai no propriedade, ne'ebé iha kompeténsia atu apresia no desidi kona-ba kazu

haksesuk malu sira. Reserva ba plenária Komisaun nian kompeténsia atu hatuur desizaun kona-ba kazu haksesuk malu ne'ebé kona-ba bein imovel balu, ne'ebé haree ba ninia valór, ninia utilizaun ba utilidade pública ka bainhira Estadu nu'udar parte.

Prosesu iha Komisaun hahú ho apresenta informasaun kona-ba kazu haksesuk malu hosi membru Governu responsavel ba área justisa, haktuir lei. Tatur, Komisaun determina prazu legál atu foti desizaun, ho nune'e, halais prosedimentu sira.

Ba Komisaun nian desizaun ikus, bele halo rekursu judisiál haktiur lei no hetan efikásia hafoin ramata prazu legál ba ninia impugnasaun. Ikus liu, iha momentu ne'ebé la posivel atu impugna ninia desizaun sira, Komisaun, ho ofisiozu, halo rejistu ba bein imovel, aspetu prosedimentu nian ne'ebé sei permiti atu konkluir, ho seguransa, rejistu no regularizasaun ba situasaun ba direitu propriedade ne'ebé iha oinmai bele iha haksesuk malu.

Bazeia artigu 55.º, n.º 1 no 57.º, n.º 2 hosi Lei n.º 13/2017, 5 Juñu, no hosi artigu 115.º, n.º 3 Konstitusaun nian, Governu dekreta atu sai lei hanesan tuirmai:

KAPÍTULU I DISPOZISAUN JERÁL SIRA

Artigu 1.º

Objetu

Diploma ida-ne'e regula kompeténsia, organizasaun, funsionamentu no estatutu pesoál hosi membru Komisaun Rai no Propriedade (Komisaun), hatuur mós regra aplikavel sira ba tramitasaun prosesu sira-ne'ebé nu'udar Komisaun nia kompeténsia

Artigu 2.º

Natureza no misaun

1 - Komisaun nu'udar ema-koletiva direitu públiku, ho natureza independente, ho autonomia administrativa, finanseira no patrimoniál, ho atribuisaun no kompeténsia ne'ebé defini iha diploma legál ida-ne'e no iha Lei n.º 13/2017, 5 Juñu.

2 - Komisaun nia misaun maka rezolve kazu haksesuk malu iha âmbito prosesu ba rekoñesimentu no atribuisaun direitu ba propriedade bein imóvel sira, haktuir Lei n.º 13/2017, 5 Juñu.

Artigu 3.º

Independénsia no responsabilidade

1 - Komisaun no ninia membru sira aktua ho independente bainhira hala'o kompeténsia sira-ne'ebé lei atribui ba sira, la bele husu nein simu instrusaun hosi Governu ka hosi kualkér entidade pública ka privada.

2 - Membru, traballadór, funsionáriu no prestadór sira servisu Komisaun nian hatán ho forma sivíl, krimínál, dixiplínár no finanseira ba atu no omisaun hirak-ne'ebé pratika bainhira hala'o sira-nia funsaun, haktuir lei.

Artigu 4.º **Atribuisaun sira**

Komisaun hala'o atribuisaun sira tuirmai:

- a) Asegura hodi rezolve kazu haksasuk malu iha âmbito prosesu ba rekoñesimentu no atribuisaun direitu ba propriedade ka direitu réal hirak seluk kona-ba bein imovel;
- b) Asegura hodi rezolve kazu haksasuk malu kona-ba bein imovel ne'ebé hetan okupasaun tanba aktu deslokasaun forsada populasaun nian;
- c) Promove konsiliaun ba interese hirak-ne'ebé iha litíjiu entre parte sira iha âmbito rezolve kazu haksasuk malu;
- d) Tau-matan ba kumprimentu lei no regulamentu no asegura protesau no tutela jurídika efetiva ba ema-interesadu sira iha prosesu atribuisaun ka rekoñesimentu ba direitu sira kona-ba bein imovel haktuir ninia kompeténsia;
- e) Promove rekoñesimentu no atribuisaun ba direitu propriedade no direitu réal hirak seluk kona-ba bein imovel ne'ebé iha haksekuk malu nia laran, bazeia ba kritériu hirak-ne'ebé hatuur iha lei;
- f) Fó-sai rekomendasaun no diretiva jenérika relasiona ho ninia atividade, liuliu kona-ba definisaun na'in ba bein imovel no ninia rejistu;
- g) Fó hanoin, tuir pedidu Parlamentu Nasionál nian ka Governu, kona-ba iniciativa lejizlativa ka iniciativa seluk kona-ba regularizasaun direitu hirak-ne'ebé relasiona ho rai no propriedade;
- h) Ezerse tan atribuisaun hirak seluk ne'ebé lei atribui ba nia.

Artigu 5.º

Kompeténsia territoriál no sede

1 - Komisaun iha kompeténsia ba territóriu tomak.

2 - Komisaun nia sede iha Dili, bele harii delegasaun ka servisu sira iha fatin kualkér territóriu nian, bainhira de'it haree katak ne'e adekuadu hodi hala'o atribuisaun sira.

Artigu 6.º **Devér ba kolaborasaun**

Ema-singulár no kolektiva, direitu públiku ka privada, iha devér atu kolabora ho Komisaun bainhira hala'o ninia atribuisaun sira, bainhira husu.

Artigu 7.º **Transparénsia**

1 – Komisaun tenke fornese informasaun iha dalen ofisiál rua, ho hakerek ka liuhosi kualkér forma apropiada, kona-ba:

- a) Natureza no âmbito litíjiu hirak-ne'ebé submete ba ninia apresiasaun;
- b) Regra ba prosedimentu aplikavel nian;
- c) Forma oinsá Komisaun desidi kona-ba litíjiu, liuliu regra sira ba votu bainhira kona-ba deliberaun no regra sira ba funsionamentu painél arbitrária nian;
- d) Norma hirak-ne'ebé fundamenta Komisaun nia desizaun;

- e) Efeitu jurídiku ba desizaun Komisaun nian;
- f) Dalan sira ba halo rekursu ne'ebé nakloke ba parte ne'ebé ninia pedidu la satisfeita;

- g) Regulamentu ba ninia funsionamentu;

2 — Komisaun tenke publika relatóriu anuál ida kona-ba ninia atividade ne'ebé permiti atu avalia rezultadu hirak-ne'ebé hetan tiha no identifika natureza hosi litíjiu hirak-ne'ebé submete tiha ba nia.

Artigu 8.º **Publisidade**

1 – Komisaun tenke kria pájina eletrónika ida, ho dados relevante kona-ba ninia atribuisaun sira, maka hanesan:

- a) Desizaun ikus sira bainhira la admiti ba rekursu;
- b) Diploma lejizlativu hotu-hotu ne'ebé regula ninia atividade;
- c) Regulamentu, orientasaun no rekomendasaun hotu-hotu ne'ebé adota ona;
- d) Planu sira atividade nian, relatóriu atividade nian no orsamentu;
- e) Informasaun kona-ba ninia atividade, maka hanesan prátika desizória, doutrina no jurisprudénsia asociada, estudu no inkéritu ka konsulta pública sira;
- f) Protokolu no akordu kooperasaun ne'ebé selebra entre entidade ka organizmu nasional ka internacional ho atribuisaun ba ninia atividade.

2 –Pájina eletrónika Komisaun nian tenke fornese mós informasaun kona-ba:

- a) Ninia orgaun sira-nia kompozisaun, elementu biográfiku no valór hosi componente sira estatutu remuneratóriu aplikavel;

- b) Mapa pesoál;
- c) Konkursu hotu-hotu ba rekrutamentu traballadór nian.

KAPÍTULU II KOMPOZISAUN NO ESTATUTU MEMBRU SIRA-NIAN

Artigu 9.º

Kompozisaun, dejiznasaun no mandatu

1 - Kompozisaun no dejiznasaun ba membru sira Komisaun nian haktuir ba Lei n.º 13/2017, 5 Juñu.

2 - Prezidente Komisaun no membru efetivu no suplente sira sei promove liuhosi rejime komisaun-de-servis, ba períodu tinan-haat, bele hafoun fali dala ida de'it .

3 - Provimentu ba membru Komisaun tenke asegura representasaun mínima 33% hosi jéneru ida-idak.

Artigu 10.º

Inkapasidade no inkompatibilidade sira

1 - Membru sira Komisaun nian ezerse sira-nia funsaun ho rejime eskluzividade, la bele:

- a) Sai titulár ba órgaun soberania, iha Rejiaun Administrativa Espesiál Oecussi-Ambeno ka podér lokál, nein ezerse kualkér funsaun públika ka privada, ho esesaun ba funsaun dosente ka investigasaun, naran katak la hetan remunerasaun;
- b) Ezerse atividade polítika;
- c) Bainhira hetan kondenasau ba prosedimentu krimínál tanba pratika krimi kontra realizasaun justisa, falsifikasaun ka iha ezersísium funsaun públika, maka hanesan krimi korrupsaun ho kualkér forma, pekulatu, abuzu-de-podér, tráfik-de-influénsia no partisipasaun-ekonómika-en-negósiu, hanesan defini iha lejislasaun penál ka hetan kondenasau iha prosedimentu krimínál ba krimi seluk punivel ho pena máxima liu tinan 3;
- d) Iha partisipasaun sosiál iha sosiedade komersiál ka kualkér entidade esterna ba Administrasaun Públika ne'ebé fó apoiu ba Komisaun iha ámbitu ezersísium ba ninia kompeténsia sira;
- e) Mantein, diretu ka indireta, kualkér vínkulu ka relasaun kontratuál, ho remunerasaun ka lae, ho entidade seluk ne'ebé iha atividade ne'ebé bele kontra ho ninia atribuisaun no kompeténsia.

2 – Membru sira Komisaun nian tenke apresenta rejistu-de-interese ba Supremu Tribunál Justisa, ne'ebé ho korresponde bele aplika buat ne'ebé prevee ba titulár sira órgaun soberania nian.

Artigu 11.º

Ramata funsaun

1 – Membru Komisaun nia funsaun ramata de'it bainhira ramata prazu mandatu nian no ramata mós bainhira:

- a) Mate ka iha impossibilidade fízika permanente ka ho durasaun ne'ebé liu tiha data ramata komisaun-de-servisu ka períodu ne'ebé dezigna ba;
- b) Renúnsia ba funsaun, liuhosi deklarasaun eskrita apresenta ba Komisaun;
- c) Komisaun ramata tanba:
 - i. i)Inkapsidade ka incompatibilidade;
 - ii. ii)Impedimentu ka suspeisaun ne'ebé la deklarar;
 - iii. iii)Falta, iha anu-sivíl hanesan, reuniaun dala-3 tuituir malu ka teri-netik reuniaun ba dala-6 exetu esepu ho motivu justifikadu.
 - iv. iv)Violasaun ba devér rezerva ne'ebé sujeita ba.
 - v.

2 – Ba kazu vakatura nian tanba motivu sira ida ne'ebé prevee iha número liubá, tenke prienxe vaga ne'e iha prazu loron-30 nia laran hafoin ninia verifikasaun, liuhosi dezigna membru foun hosi entidade competente.

3. Membru sira Komisaun nian ramata sira-nia funsaun ho pose mebru foun sira ne'ebé hetan dezignasaun hodi okupa fatin ida-idak.

Artigu 12.º

Impedimentu no suspeisaun

1 – Membru sira Komisaun nian sujeita ba rejime impedimentu no suspeisaun ne'ebé aplika ba juiz sira, be prevee iha Kódigu Prosesu Sivíl.

2 –Suspeisaun no pedidu eskuza ba membru sira Komisaun nian sei apresia no desidi iha plenáriu Komisaun nian.

3 - Aktu hirak-ne'ebé realiza tiha ho viola regra sira-ne'ebé prevee iha número liubá Komisaun anula ho ofisiozu ka liuhosi rekerimentu ema-interesadu nian.

Artigu 13.º

Devér sira

1 - Nu'udar devér membru Komisaun nian maka:

- a) Ezerse kargu ho izensaun, rigór no independénsia;
- b) Partisipa ho ativa no asuidu iha servisu sira Komisaun nian.

2 - Membru sira Komisaun nian, nomós pesoál ne'ebé fó apoiu ba sira no kolaboradór eventuál hirak seluk, iha devér sijilu, la bele halo deklarasaun ka

komentáriu kona-ba prosesu hirak-ne'ebé la'o hela ka kestaun konkreta hirak-ne'ebé sai hela objetu ba apresiasaun ka kona-ba ninia interveniente sira.

3 - La inklui iha devér sijilu, deklarasaun ne'ebé relasiona ho prosesu hirak-ne'ebé konklui ona, nomós prestasaun informasaun ne'ebé ho objetivu ba realiza direitu ka interese lejítimu no dispostu kona-ba publisidade desizaun nian.

Artigu 14.º

Estatutu remuneratóriu

Rejime remuneratóriu ba membru sira Komisaun Aprova hosi Dekretu Governu ho proposta hosi Ministru Justisa no Finansas.

KAPÍTULU III

ORGANIZASAUN NO FUNSIONAMENTU

Artigu 15.º

Organizasaun

- 1 – Prezidente ida maka prezidi Komisaun no funsiona ho karatér permanente.
- 2 -Komisaun ne'e organiza ba sesaun plenária no painél arbitrál ho kompeténsia ba halo desizaun, haktuir lei ida-ne'e.
- 3 - Komisaun fornese servisu mediasaun.
- 4 - Komisaun hetan apoiu hosi sekretariadu tékniku ida, inklui servisu sira apóiu jurídiku, administrativu no tradusaun.

Artigu 16.º

Kompeténsia sira Prezidente nian

Prezidente Komisaun nia kompeténsia maka:

- a) Reprezenta Komisaun;
- b) Konvoka sesaun plenária no determina orden-de-traballu;
- c) Prezidi no diriji servisu sira sesaun plenária nian;
- d) Konstitui painél arbitrál hafoin halo sorteiu ba elementu sira no fahe prosesu sira;
- e) Partisipa iha painél arbitrál sira ba prosesu hirak-ne'ebé atribui ba liuhosi sorteiu;
- f) Enjerál, asegura kumprimentu ba lei no regularidade deliberaun nian.

Artigu 17.º

Kompeténsia plenáriu nian

Plenáriu Komisaun nia kompeténsia maka:

- a) Elabora no aprova regulamentu kona-ba Komisaun nia atividade, haktuir lei ne'ebé iha;
- b) Apresia filafali desizaun sira painél arbitrária nian bazeia ba pedidu hosi elementu sira ida, ne'ebé ho fundamentu ba ilegalidade;
- c) Ezerse kompeténsia hotu-hotu painél arbitrál nian kona-ba bein-imovel ne'ebé:

- i) Hetan reklamasaun hosi Estadu, ne'ebé Estadu hanesan na'in ba bein imovel;
- ii) Ninia valór avaliadu boot liu \$ 500.000,00 (rihun atus lima) dólar amerikanu;
- iii) Nu'udar objetu ba prosesu espropriaun ba utilidade pública;
- iv) Nu'udar objetu ba projetu investimentu ne'ebé aprova ona haktuir lei.

Artigu 18.º

Plenáriu

1 - Plenáriu Komisaun nian reuni ho ordináriu haktuir períodu ne'ebé sei determina iha rejimentu internu Komisaun nian no ho estraordináriu bainhira de'it presidente konvoka, liuhosi ninia iniciativa ka liuhosi pedidu hosi membru sira.

2 - Sesaun sira plenáriu Komisaun nian la'ós públiku no realiza iha Komisaun nia fatin ka, liuhosi ninia deliberaun, hala'o iha kualkér fatin iha territóriu nasional.

3 - Prezidente Komisaun, bainhira konsidera conveniente, bele, ho akordu Komisaun nian, konvida atu partisipa iha reuniaun sira, exetu iha faze hatuur desizaun nian, kualkér ema ne'ebé ninia prezensa konsidera util.

4 - Kona-ba sesaun sira sei hakerek akta, hafoin Komisaun aprova tiha, sei asina hosi presidente no hosi membru hirak-ne'ebé partisipa.

Artigu 19.º

Deliberaun plenáriu nian

1 - Konsidera de'it katak plenáriu Komisaun nian funsiona bainhira maioria membru marka prezensa.

2 – Deliberaun sei foti liuhosi maioria votu prezente, la admiti abstensaun, bele deklara deklarasaun-de-votu.

3 – Deliberaun sira sei foti liuhosi votasaun nominál, membru sira tenke vota uluk no, ikus maka presidente, ne'ebé iha kazu empate, presidente iha votu-de-kualidade.

4 – Sira ne'ebé la bele marka prezensa iha momentu diskusaun nein iha votasaun maka membru sira-ne'ebé iha impedimentu hela ka konsidera hetan impedimentu.

5 – Bele sai de'it objetu ba deliberaun maka asuntu hirak-ne'ebé inklui tiha iha orden-du-dia reuniaun nian, exsetu pelumenús membru rua rekoñese deliberaun imediata kona-ba asuntu hirak seluk.

Artigu 20.º

Orden-de-traballu

1 – Orden-de-traballu ba sesaun ida-idak sei determina hosi presidente, ne'ebé iha loron-2 util tenke komunika ho hakerek ba membru hirak seluk molok data realizasaun.

2 – Iha orden-de-traballu tenke inklui asuntu hirak-ne'ebé ninia finalidade indika hosi kualkér membru traballu, bainhira de'it nu'udar kompeténsia plenáriu nian no pedidu ne'e apresenta ho hakerek iha loron lima molok data realiza reuniaun.

Artigu 21.º

Akta reuniaun nian

1 – Ba sesaun ida-idak sei hakerek akta ne'ebé sei tau rezumu kona-ba buat hotu-hotu ne'ebé hala'o iha sesaun, ne'ebé indika data no fatin reuniaun nian, membru sira-ne'ebé marka prezensa, asuntu ne'ebé apresia, deliberaun ne'ebé foti no forma no rezultadu hosi votasaun sira.

2 – Sekretáriu ida maka hakerek akta no apresenta ba aprovasaun membru hotu-hotu nian iha sesaun nia rohan ka iha inísiu loron tuirmai, ne'ebé presidente asina nomós membru partisipante sira.

Artigu 22.º

Rejista iha akta votu-de-vensidu

1 – Membru sira Komisaun nian halo tau iha akta sira-nia votu-de-vensidu no razaun sira-ne'ebé justifika.

2 – Membru sira-ne'ebé vota ho votu-vensidu iha deliberaun ne'ebé foti tiha no rejista deklarasaun votu nian iha akta sei la hetan responsabilidade ne'ebé bele mosu iha oinmai.

SESAUN IV **PAINÉL ARBITRÁL SIRA**

Artigu 23.º

Painél arbitrál sira

1 - Disputa sira iha âmbito prosesu rekoñesimentu no atribuisaun ba direitu propriedade sei apresia no desidi hosi painél arbitrál ho autonomia hodi hatuur desizaun.

2 - Painél arbitrál ida-idak forma hosi membru tolu, ne'ebé na'in-rua jurista no na'in-ida tékniku espesializadu ba rai no propriedade.

3 - Ba prosesu ida-idak, elementu sira painél arbitrál nian sei hili liuhosi sorteiu entre membru sira Komisaun nian.

Artigu 24.º

Painél arbitrária sira-nia kompeténsia

Painél arbitrária sira iha kompeténsia hodi desidi ba:

- a) R
ekoñese ka atribui direitu propriedade ka direitu hirak seluk bazeia ba kritériu hirak-ne'ebé lei estabelese;
- b) D
etermina, fiksa no arbitra kona-ba ezisténsia obrigasaun hodi fó indemnizasaun no reembolsu haktuir lei, determina ninia valór bazeia ba kritériu uniforme no ekuitativu sira.

Artigu 25.º

Deliberasaun iha painél abitrál

1 - Konsidera painél abitrál funsiona bainhira ninia elementu sira hotu marka prezensa.

2 - Desizaun sei foti hosi maioria votu nian, ne'ebé ho korresponde bele aplika dispostu iha númeru 2, 3 no 4 hosi artigu 19.º.

3 - Bainhira la iha konsensu iha votasaun, membru ne'ebé vota kontra bele husu atu plenáriu Komisaun nian apresia hikas prosesu, ho fundamentu ba ilegalidade.

4 - Apresiasaun hikas implika hasa'e prosesu ba plenáriu.

SESAUN V MEDIASAUN

Artigu 26.º

Servisu mediasaun

1 - Komisaun dispoin servisu mediasaun ne'ebé fornese mediasaun ba ema ne'ebé iha interese, hanesan forma hodi rezolve ho alternativa lia haksasuk malu.

2 - Servisu mediasaun iha objetivu atu estimula rezolusaun, ho karatér preliminar, ba lia haksasuk malu liuhosi akordu entre parte sira.

3 - Servisu mediasaun iha kompeténsia eskruziva atu halo mediasaun ba kualkér disputa hirak-ne'ebé tama iha kompeténsia Komisaun nian.

4 - Funsionamentu servisu mediasaun Komisaun nian, nune'e mós regra sira kona-ba nomeasaun mediadór, sei haktuir ba regra hirak-ne'ebé determina iha diploma ministeriál hosi membru Governu responsavel ba área justisa.

Artigu 27.º

Mediadór sira

1 – Mediadór sira-ne'ebé kolabora ho Komisaun nu'udar profesionál independente, iha abilidade atu halo servisu mediasaun, haktuir artigu ida-ne'e.

2 - Bele sai mediadór iha Komisaun maka ema ne'ebé:

- a) Iha tinan liuhosi 35;

- b) Iha lisensiatu ka grau akadémiku superiór;
- c) La hatudu falta kbiit hodi halao ninia knaar sira, hodi asegura halao knaar sira ne'e ho imparcialidade, integridade, kompeténsia, kompromisu no responsabilidade;

d) Domina dalen ofisiál sira ida;

e) Iha sertifikadu nu'udar mediadór fó-sai hosi Sentru Formasaun Jurídika no Judisiária ka hosi instituisaun internasionál kredensiada ba ida-ne'e;

f) Hetan selesaun hosi konkursu kurrikulár ne'ebé loke ba mediadór;

3 -Regulamentu ba konkursu ne'ebé temi iha alínea f) número liubá nian, sei aprova hosi diploma ministeriál hosi membru Governu responsavel ba área justisa.

4 - Hafoin selesaun, sei elabora lista, tuir orden alfabetu, kona-ba mediadór abilitadu atu ezerse funsaun iha Komisaun.

5 - Inskrisaun iha lista mediadór nian la garante atu hetan kualkér pagamentu remunerasaun hosi Estadu.

6 - Bainhira hili ona mediadór abilitadu sira atu intervein iha prosesu mediasaun, sei kontrata tuir rejime prestasaun servisu, ne'ebé sei selu tuir prosesu ida-idak ne'ebé atribui tiha ba.

7- Membru Governu responsavel ba área justisa aprova lista mediadór abilitadu sira nomós rejime kona-ba remunerasaun nian.

8- Lista ne'ebé temi iha número liubá sei atualiza tinan-tinan liuhosi despaxu membru Governu responsavel ba área justisa.

SESAUN VI SEKRETARIADU TÉKNIKU

Artigu 28.º

Sekretariadu tékniku

1– Apoiu tékniku no administrativu ba funsionamentu Komisaun nian sei asegura hosi sekretariadu tékniku, ne'ebé kona-ba organizasaun no funsionamentu determina iha rejimentu internu Komisaun nian.

2 –Sekretariadu tékniku deriji hosi sekretáriu ida, ne'ebé nomeia hosi membru Governu responsavel ba área justisa, ne'ebé hetan paresér favorál hosi Komisaun, be hili entre ema abilitada sira-ne'ebé ho lisensiatu ka grau superiór

3 –Nomeasaun ba sekretáriu halo tuir rejime komisaun servisu ba período tinan-4.

4 – Remunerasaun sekretáriu nian korresponde ho remunerasaun no suplementu ba kargu diretór-jerál iha rejime funsaun públika nian.

Artigu 29.º

Kompeténsia sira sekretáriu nian

1 – Sekretáriu Komisaun nia kompeténsia:

- a) Fó sekretaria ba Komisaun;
 - b) Kumpri deliberaun sira Komisaun nian;
 - c) Asegura organizaun no funsionamentu di'ak sekretariadu tékniku nian, iha área jestaun ba finseira, ba pesoál no ba instalasaun no ekipamentu sira, haktuir orientaun sira presidente komisaun nian;
 - d) Elabora projetu orsamentu, nune'e mós alterasaun sira, no asegura sira-nia ezekusaun;
 - e) Submete planu asaun anuál, orsamentu no planu aprovizionamentu ba plenáriu Komisaun nian hodi hetan aprovasaun;
 - f) Elabora projetu relatóriu anuál no submete ba plenáriu nia aprovasaun.
- 2 – Sekretáriu sei substitui, bainhira nia falta no hetan impedimentu, haktuir rejimentu Komisaun nian.

SESAUN VII

KONSULTÓR SIRA NO IDENTIFIKASAUN BA REKURSU UMANU SIRA

Artigu 30.º

Konsultór sira

1 – Asesór tékniku sira-ne'ebé kolabora ho Komisaun, sei kontrata bazeia ba rejime jurídiku kontratu traballu termu sertu iha Administrasaun Públika, ne'ebé tau iha Dekretu Governu n.º 6/2015, 18 Novembru, ho spesifisidade hirak-ne'ebé prevee iha artigu ida-ne'e.

2– Nu'udar kondisaun ne'ebé la bele dispensa iha rekrutamentu asesór tékniku nian maka kompeténsia profisionál ne'ebé boot no esperiénsia válida hodi ezerse funsaun, ne'ebé sei avalia bazeia ba kurríkulu.

3 – Bele ezerse funsaun nu'udar asesór jurídiku iha Komisaun ema ne'ebé:

- a) Iha grau akadémiku mestradu ka iha grau akadémiku superiór iha Direitu no iha esperiénsia komprovada kona-ba domínio direitu réal ka rejistu prediál ka, ho alternativa, iha lisenziatura iha Direitu no, mínimu iha esperiénsia tinan-8 iha área Direitu réal no rejistu prediál;
- b) La hatudu falta kbiit hodi halao ninia knaar sira, hodi asegura halao knaar sira ne'e ho imparcialidade, integridade, kompeténsia, kompromisu no responsabilidade;
- c) Iha domínio ba dalen ofisiál sira ida;
- d) Hetan selesaun iha konkursu públiku liuhosi selesaun-abertu ba funsaun ne'e.

Artigu 31.º

Karta identifikaun

Membru no funsionáriu sira Komisaun nian tenke iha kartaun identifikaun, iha-ne'ebá tau kargu ne'ebé dezempeña no podér inerente ba sira-nia funsaun.

KAPÍTULU IV
PROSEDIMENTU NE'EBÉ APLIKAVEL BA DESIZAUN

SEKSAUN I
DISPOZISAUN JERÁL SIRA

Artigu 32.º

Prinsípiu fundamentál sira

1– Nu'udar prinsípiu fundamentál ba prosedimentu iha Komisaun maka:

- a) Parte sira sei trata ho hanesan;
- b) Iha faze hotu-hotu prosesu nian sei garante atu kumpri prinsípiu kontraditóriu;
- c) Tenke rona parte sira, ho ko'alia ko liuhosi hakerek, molok fó-sai desizaun ikus;
- d) Boa-fé no kooperasaun entre parte sira oinsá intervein iha prosesu no relasaun entre sira no ho Komisaun;
- e) Komisaun nia desizaun sira sei publika, haktuir diploma legál ida-ne'e.

2 – Prosedimentu sira-ne'ebé hala'o iha Komisaun sei orienta hosi prinsípiu simplisidade, adekuasaun, informalidade no ekonomia prosesuál.

Artigu 33.º

Lian ne'ebé uza iha prosesu

1 – Lahó prejudika dispostu iha número hirak tuirmai, iha prosesu hotu-hotu ne'ebé sei hala'o iha Komisaun sei uza dalen portugés ka dalen tetun.

2 – Aktu hotu-hotu ne'ebé atu notifika ba parte sira no ba ema-interesadu hirak seluk, ho obrigatóriu sei hakerek iha dalen ofisiál rua, liuliu sitasaun, notifikasaun no desizaun ikus.

3 – Komisaun bele, hafoin rona tiha parte sira, aseita depoimentu no dokumentu hosi dalen nasional ka estranjeira, ne'ebé sei desidi se prezisa ka la prezisa tradusaun.

Artigu 34.º

Konta prazu sira

1 – Prazu hotu-hotu ne'ebé determina iha lei ida-ne'e continua de'it, la suspende iha loraon sabadu, domingu no feriadu, nein iha férias judisiál.

2 – Prazu sei sura hahú iha loraon util hafoin loraon ida-ne'ebé simu tiha sitasaun ka notifikasaun.

3 – Bainhira falta dispozisaun espesiál ka determina painél arbitrál, prazu ba pratika kualkér aktu maka loraon-8.

4 – Bainhira prazu ramata iha loron ne'ebé Komisaun taka hela, transfere fali prazu ramata ne'e ba loron dahuluk ne'ebé Komisaun funsiona fali.

Artigu 35.º

Parte sira

1 – Iha prosesu hirak-ne'ebé hala'o iha Komisaun, bele sai parte sira maka ema-singulár ka kolektiva, públika ka privada, nune'e mós entidade hirak seluk ho personalidade judisiária.

2 – Bainhira Estadu maka sai parte ba prosesu ida iha Komisaun, nu'udar kompeténsia servisu kompetente ba área rai no propriedade atu asegura ninia representasaun.

Artigu 36.º

Apoiu Jurídiku ba parte sira

1. Parte sira tenke marka prezensa rasik iha Komisaun, bele hetan akompañamentu, hosi advogadu ka defensor públiku.
2. Bainhira parte sira la bele marka prezensa ho pesoál iha Komisaun, bele husu mandatáriu ka defensor públiku hodi representa, ne'ebé hetan nomeasaun ba ida-ne'e.
3. Parte sira bele husu ba Komisaun apoiu jurídiku gratuitu, ne'ebé servisu jurídiku ba Sekretariadu Komisaun mak fó.

Artigu 37.º

Fahe prosesu sira

1 – Prezidente Komisaun maka fahe prosesu sira liuhosi sorteiu, haktuir regra hirak-ne'ebé determina iha rejimentu internu ne'ebé aprova ona.

2 – Konsidera katak prosesu fahe tiha bainhira membru hotu-hotu ne'ebé kompoin painél arbitrál aseita enkargu.

Artigu 38.º

Sitasaun no notifikasaun

1 – Sekretariadu Komisaun nian maka sei halo sitasaun no notifikasaun ba hela-fatin ne'ebé tau iha prosesu.

2 – Sitasaun no notifikasaun sira sei halo tuir Kódigu Prosesu Sivíl.

Artigu 39.º

Komunikasaun ho hakerek

1- Dokumentu hirak-ne'ebé haruka ba Komisaun sei ho hakerek, la sujeita ba formalidade espesiál.

2 – Dokumentu hotu-hotu ne'ebé haruka ba Komisaun ka ba ninia painél arbitrál sira, liuliu espozisaun inisiál ba parte sira no intervensaun sira tuirmai, bele entrega:

- a) Ba Komisaun, ho papél ka liuhosi eletróniku;

b) Ba servisu munisipál sira no ba RAEOA responsavel ba rai no propriedade.

3 – Ba kazu ne'ebé prevee iha alínea b), apresentasaun ba dokumentu sira halo liuhosi suporte papél, no entidade sira-ne'ebé temi iha leten tenke haruka tutan dokumentu sira ba Komisaun iha prazu másimu loron-3, liuhosi eletróniku.

4 – Orijinál hosi kualkér dokumentu ne'ebé haruka liuhosi eletróniku ba Komisaun tenke haruka fizikamente ba Komisaun iha prazu másimu loron-30.

5 – Bainhira kestaun ne'ebé hamosu la'ós nu'udar kompeténsia Komisaun nian, tenke haruka kestaun ne'e ba entidade competente, ho informasaun hosi sé maka apresenta tiha.

Artigu 40.º

Meiu sira prova nian

1 – Bele prodús iha Komisaun nia oin kualkér prova ne'ebé admiti iha Direitu, ne'ebé nu'udar responsabilidade parte sira-nian ba prodús ka apresenta prova, inklui prova testemuña no perisiál.

2 – Parte sira maka apresenta testemuña, maibé, Komisaun bele determina data no fatin inkirisaun la hanesan.

3 – Komisaun bele, liuhosi ninia iniciativa rasik ka liuhosi rekerimentu hosi parte sira ida:

- a) Rekolla depoimentu pesoál hosi parte sira;
- b) Rona ema-datoluk;
- c) Husu atu entrega dokumentu sira-ne'ebé iha pose parte sira-nian ka ema-datoluk nian;
- d) Realiza ezame ka verifikasaun direta.

4 – Komisaun bele rejenta dilijénsia hirak-ne'ebé parte sira husu ba nia, se haree katak dilijénsia sira-ne'e la relevante ba desizaun ka hatudu dilatória.

Artigu 41.º

Peritu sira

1 – Komisaun, liuhosi iniciativa rasik ka liuhosi pedidu parte sira-nian, bele nomeia peritu ida ka liu atu elabora relatóriu ida, ho ko'alia ka hakerek, kona-ba kestaun spesífika sira.

2 – Ba kazu ne'ebé prevee iha número liubá, Komisaun bele husu kualkér parte sira atu fornese ba peritu kualkér informasaun relevante ka apresenta ka fakulta asesu ba kualkér dokumentu relevante atu inspesiona.

3 – Komisaun bele konvoka peritu atu partisipa iha audénsia, parte sira bele apresenta diretamente ba peritu kestaun hirak-ne'ebé konsidera relevante.

4 – Remunerasaun ba peritu sira haktuir dispostu iha Kódigu Kustu Judisiál, ho adaptasaun ne'ebé presiza.

Artigu 42.º

Enkargu, kusta no taxa

La iha fatin atu selu kualkér enkargu, kusta ka taxa tanba prosesu ne'ebé hala'o termu idaidak ih komisaun.

SEKSAUN II TRAMITASAUN BA PROSESU

Artigu 43.º

Formalidade prévia sira

Ramata tiha prazu ne'ebé prevee iha lei atu apresenta deklarasaun titularidade iha âmbito levantamentou kadastrál, servisu responsavel ba kadastru propriedade nian haruka, ho obrigatóriu, iha prazu másimu loron-15, ba membru Governu kompetente iha área justisa, informasaun sira tuirmai kona-ba bein imovel ne'ebé iha haksesuk nia laran:

- a) Identifikasaun parte sira-nian no ema-interesadu eventuál sira, ho hatudu hela-fatin no kontaktu seluk ne'ebé disponivel;
- b) Identifikasaun ba soin imovel, ho hatudu númeru úniku identifikasaun prédiu nian, hatudu lokalizasaun prédiu nian, lokalizasaun administrativa parcela nian, lokalizasaun jeorreferénsia parcela nian no tipu parcela haktuir espesifikasaun téknika;
- c) Planta kadastrál;
- d) Kópia hosi deklarasaun titularidade ema-singulár ka koletiva, ho direitu públiku ka privadu, ne'ebé apresenta tiha kona-ba soin imovel;
- e) Indikasaun ba valór soin imovel nian.

Artigu 44.º

Hahú prosesu

Presesu iha Komisaun hahú ho ofisiozu ho apresentasaun informasaun kona-ba kazu disputadu hosi membru Governu responsavel ba área justisa ka hosi parte interesadu sira.

Artigu 45.º

Forma painél arbitrál no fahe prosesu

Prezidente Komisaun maka forma painél arbitrál no fahe prosesu, iha prazu másimu loron-5 nia laran sura hosi data hahú prosesu, haktuir lei ida-ne'e.

Artigu 46.º

Sitasaun ba parte sira

1 – La depende ba despaxu, sekretariadu Komisaun nian, iha prazu másimu loron-5 nia laran sura hosi data hahú prosesu, promove sitasaun ba parte sira,

haruka ba sira kópia hosi informasaun ne'ebé apresenta bazeia ba artigu 44.º no prazu ba, hakarak, pronunsia.

2 – Parte sira dispoin iha prazu loron-15 nia laran sura hosi data sitasaun nian atu pronunsia, bele apresenta buat ne'ebé conveniente, maka hanesan:

- a) Espozisaun kona-ba faktu sira no, bainhira posivel, kona-ba razaun sira direitu nian ne'ebé serve nu'udar fundamentu ba pedidu;
- b) Referénsia ba meu sira prova nian;
- c) Indikasaun ba testemuña sira, másimu na'in-3;
- d) Fatin ne'ebé iha tempu oinmai sei haruka sitasaun no notifikasaun ba.

3 – Espozisaun ne'ebé apresenta hosi parte interesada ida-idak tenke tau hamutuk ho dokumentu hirak-ne'ebé atu hatebes faktu ne'ebé serve hanesan baze ba ninia pedidu.

Artigo 47.º

Formalidade subsekvente sira

1 – Sei notifika parte sira kona-ba espozisaun inisiál kontraparte nian no dokumentu hirak-ne'ebé akompaña, atubele pronunsia, iha prazu loron-15 nia laran.

2 – Notifika ho mós eventuál ema-interesadu sira, ho termu hanesan no ba efeito hanesan ne'ebé prevee iha número liubá.

Artigo 48.º

Dilijénsia probatória no audénsia ba parte sira

1 – Parte sira ida maka falta atu pronunsia sei la iha efeito kominatóriu, ne'ebé painél arbitrál tenke desidi bazeia ba elementu hirak-ne'ebé iha prosesu.

2 - Painél arbitrál bele, liuhosi ninia iniciativa rasik ka liuhosi rekerimentu parte sira-nian, delibera hodi realiza dilijénsia probatória adisionál ka audénsia ba parte sira.

Artigo 49.º

Audénsia ba parte sira

1 – Bainhira presidente painél arbitrál nian desidi atu halo audiénsia, determina data atu parte sira marka prezensa iha Komisaun.

2 – Sei notifika parte sira iha loron-15 nia laran molok data realiza audénsia.

3 – Audénsia tenke hala'o iha prazu másimu loron-60 nia laran sura hosi data ramata prazu ne'ebé prevee iha número 1 no 2 artigu 48.º nian.

4 – La bele admiti atu iha adiamentu ba audiénsia liuhosi dala ida, maske hosi akordu parte sira-nian.

5 – Testemuña sira la hetan notifikasaun, parte sira maka apresenta testemuña iha audénsia.

Artigu 50.º

Konsiliaun ba parte sira

1 – Iha momentu ne'ebé de'it prosesu nian, to'o desizaun ikus audénsia nian, parte sira bele konsilia malu, ne'ebé ramata prosesu liuhosi akordu.

2 – Ba kazu ne'ebé prevee iha númeru liubá, parte sira elabora akordu ho hakerek, ho apoiu hosi servisu jurídiku Komisaun nian, ne'ebé hafoin parte sira asina, painél arbitrál sei omologa, ne'ebé iha valór desizaun nian.

Artigu 51.º

Desizaun no notifikasaun

1 – Sei elabora desizaun ho hakerek, ne'ebé tau:

- a) Identifiksaun parte sira-nian no, bainhira iha, ema-interesadu no ema-kontra interesadu sira-nian;
- b) Objetu litíjiu nian;
- c) Referénsia ba kompeténsia painél arbitrál nian no indikasaun ba forma hodi halo desizaun;
- d) Fundamentasaun susinta, ne'ebé indika faktu no direitu sira;
- e) Desizaun espresa bainhira kona-ba rekoñesimentu ka atribuisaun direitu réal ba objetu litíjiu nian no eventúal obligasaun ba indemnizasaun;
- f) Fatin no data ne'ebé fó-sai;
- g) Identifikasaun no asinatura hosi ema ne'ebé fó-sai;

2 – Desizaun Komisaun nian sei notifika ba parte sira ida-idak rasik.

Artigu 52.º

Prazu atu fó-sai desizaun

1 - Painél arbitrál nia desizaun fó-sai iha prazu másimu fulan-6 nia laran sura hosi hahú prosesu.

2 – Prazu ne'ebé defini iha nº 1 bele proroga liuhosi akordu parte sira-nian ka, ho alternativa, liuhosi desizaun painél arbitrál nian, to'o dobru durasaun inisiál nian, prorogasaun tenke ho fundamentu.

3 – Membru sira painél arbitrál nian ne'ebé laho justifisaun kontra desizaun ne'ebé fó-sai iha prazu ne'ebé determina ona, haktuir lei, sei hatán ba danu ne'ebé hamosu tiha.

Artigu 53.º

Interpretasaun no koresaun ba desizaun

1 - Kualkér parte bele husu ba painél arbitrál, iha prazu loron-15 nia laran hafoin iha notifikasaun ba desizaun atu:

- a) Korrije erru materiál ne'ebé iha desizaun;
- b) Nulidade ba desizaun tanba la tau elementu balu ne'ebé temi iha número 1 artigu 51.º ka tanba eziste opozisaun entre fundamentu no desizaun;
- c) Halo esklaresimentu ba obskuridade ka ambiguidade desizaun nian ka ninia fundamentu.

2 - Apresenta tiha rekerimentu, painél arbitrál ordena atu rona parte seluk, ba ida-ne'e, ema-kontrainteresadu sira sei pronunsia iha prazu loron-3 nia laran, hafoin Komisaun desidi iha prazu loron-3 nia laran.

Artigu 54.º

Impugnasaun judisiál

1 - Kona-ba desizaun sira painél arbitrál nian nakloke ba rekursu judisiál ne'ebé sei apresenta ba tribunál 1º instánsia tuir kompeténsia territoriál, iha prazu loron-60 nia laran sura hosi ninia notifikasaun ba parte sira.

2 – Rekursu ba desizaun painél arbitrál nian iha efeito suspensivu.

3 – Sei estrai sertidaun ba desizaun painél arbitrál nian ba efeito sira impugnasaun judisiál nian.

Artigu 55.º

Efeito sira desizaun nian

Painél arbitrál nia desizaun prodús efeito hafoin ramata prazu ba impugnasaun judisiál.

Artigu 56.º

Rejistu ba bein imovel sira

1 - Painél arbitrál nia desizaun ne'ebé atribui ka rekoñese direitu propriedade ka direitu réal hirak seluk ba bein imovel ida, hetan título bastante ba efeito sira rejistu prediál nian.

2 – Rejistu prediál ba bein imovel ne'ebé refere iha número liubá sei promove ho ofisiozu iha prazu loron-30 nia laran sura hosi ramata prazu ba impugnasaun judisiál.

3 – Ba efeito sira dispostu número liubá nian, sekretáriu Komisaun nian haruka sertidaun hosi desizaun nian ba konservadór competente.

Artigu 57.º

Publisidade ba desizaun sira

1 - Komisaun nia desizaun hirak-ne'ebé tribunál konsidera la bele impugna tuir lei, sei publika iha Jornál Repúblika, ne'ebé disponivel no iha asesu livre iha pájina eletrónika Komisaun nian.

2 – Bele estrai sertidaun ba kualkér elementu hosi prosesu ne'ebé ramata ona, liuhosi rekerimentu kualkér ema-partikulár ba Komisaun.

KAPÍTULU V

REJIME FINANSEIRU NO ADMINISTRATIVU

Artigu 58.º

Reseita no despeza sira

1 – Komisaun nia reseita maka:

- a) Dotasaun hirak-ne'ebé Orsamentu Estadu atribui;
- b) Subsídium, subvensaun, kompartisaun, doasaun no legadu, hirak-ne'ebé fó hosi entidade públika, nasionál, estranjeira ka internasionál;
- c) Kualkér reseita seluk ne'ebé atribui hosi lei no kontratu.

2 – Nu'udar despeza sira Komisaun nian maka despeza hirak-ne'ebé hamosu hosi enkargu no responsabilidade ne'ebé maihosi ninia funsionamentu, nune'e mós kualkér despeza ne'ebé relasiona ho prosekusaun ba ninia atribuisaun sira.

3 – Komisaun nia konta sujeita ba, bazeia ba termu jerál, kontrólu Kámara Kontas nian.

Artigu 59.º

Planu ba atividade sira no orsamentu

1 – Presiza aprovasaun hosi membru Governu responsavel ba área Justisa maka:

- a) Orsamentu;
- b) Planu ba atividade sira;
- c) Planu ba aprovizionamentu.

2 – Bele rejeita aprovasaun ne'ebé prevee iha número liubá liuhosi desizaun ne'ebé ho fundamentu ba ilegalidade ka prejuízu ba objetivu sira Komisaun nian ka ba interese públiku nian.

3 – Relatóriu anuál atividade sira-nian no relatóriu konta sira-nian tenke submete ba membru Governu responsavel ba área Justisa to'o 30 Abril tinan-tinan, hosi ne'ebá, sei haruka ba Parlamentu Nasionál.

4– Membru Governu responsavel ba área justisa bele husu ba Komisaun informasaun sira kona-ba ezekeusaun planu atividade, aprovizionamentu no orsamentu.

Artigu 60.º

Rejime ba pesoál

1 – Ba pesoál sekretariadu tékniku Komisaun nian sei aplika rejime jerál funsaun públika nian, ho espesifisidade sira-ne'ebé prevee iha lei ida-ne'e.

2 – Ba kuadru pesoál Komisaun nian, nune'e mós konteúdu funksionál karreira nian, sei determina iha Diploma Ministériu Justisa nian.

3 – Bainhira kompleksidade no espesifisidade asuntu nian maka ezije, presidente Komisaun bele autoriza atu kontrata pesoál ho rejime kontratu termu sertu Administrasaun Públika nian.

4 – Rekrutamentu ba pesoál Komisaun nian, maka hanesan konsultór jurídiku no kolaboradór hirak seluktan, tenke respeita prosedimentu konkursu públiku, ne'ebé konsidera ho prinsípiu sira tuirmai:

- a) Publisitasaun kona-ba oferta empregu iha pájina eletróniku Komisaun no Ministériu Justisa nian;
- b) Igualdade ba kondisaun no oportunidade ba kandidatu sira;
- c) Aplikasaun métodu no kritériu objetivu sira no detalladu ba avalisaun no selesaun;
- d) Fundamentu ba dezisaun.

KAPÍTULU VI DISPOZISAUN FINÁL SIRA

Artigu 61.º

Harii Komisaun

Membru Governu responsavel ba área justisa maka asegura kondisaun no meu sira hodi fó apoiu, meu umanu no meu materiál hirak-ne'ebé prezisa ba harii Komisaun.

Artigu 62.º

Regulamentu sira

1 – Komisaun iha kompeténsia atu aprova ninia regulamentu no regulamentu hirak seluk ne'ebé konsidera nesesáriu ba presekusaun di'ak Komisaun nian.

2 – Regulamentu sira Komisaun nian publika iha *Jornal da República* série II.

Artigu 63.º

Hahú hala'o knaar ho kbiit legál

Dekretu-Lei ida-ne'e hahú vigora iha loron tatur ninia publikasaun.

Aprova iha Konsellu Ministru iha 30 Jeneiru 2019

Primeiru-Ministru,

Taur Matan Ruak

Ministru Justisa,

Manuel Cárceres da Costa

Promulga iha 29/Jan/2020

Bele publika.

Prezidente Repúblika

Dr. Francisco Guterres Lú Olo